

Հ Ա Ն Գ Ի Ս Տ
ՀՈԳԵՇԵՆՈՐՀ Տ. ԳԱՐԵԳԻՆ ԾԱԳՐԱԳՈՒՅՆ
ՎԱՐԴԱՊԵՏ ՏԵՐ-ՀԱԿՈԲՅԱՆԻ
(1881—1962)



Մարտի 28-ին, սրտի երկարատև հիվանդությունից հետո, իր մահկանացուն կնքեց Մայր Աթոռի միաբան Տ. Գարեգին ծայրագույն վարդապետ Տեր-Հակոբյանը։

Հանգուցյալը ծնվել է 1881 թվականի հունիսի 21-ին, Հոկտեմբերյանի շրջանի Մրգաշատ գյուղում, քահանայի ընտանիքում։ Սկզբնական կրթությունը նա ստանում է ծննդավայր գյուղի և ապա Երևանի ծխական դպրոցներում։ 1892 թվականին ընդունվում է Թբիլիսիի Ներսիսյան դպրանոցը և 1898 թվականին ավարտում լրիվ դասընթացը։

1898—1900 թվականներին պաշտոնավարում է Մայր Աթոռում որպես Սինոդի գրագիր։ Ապա, տեղափոխվելով իր ծննդա-

վայրը, 1902—1906 թվականներին աշխատել է որպես ուսուցիչ։

1906 թվականին, Տ. Հուսիկ արքեպիսկոպոս Մովսիսյանի ձեռամբ, ձեռնադրվում է քահանա և պաշտոնավարում զանազան շրջաններում։

1947 թվականին, որպես այրի քահանա, ընդունվում է Ս. Էջմիածնի միաբանության շարքերը։ Ապա նշանակվում է Շիրակի թեմի առաջնորդ։ 1949 թվականին ստանում է ծայրագույն վարդապետի աստիճան։

Գարեգին ծայրագույն վարդապետ 1953—1955 թվականներին պաշտոնավարում է Բաքվում, որպես առաջնորդ։ 1955 թվականին նշանակվում է Նոր-Նախիջևանի և Հյուսիսային Կովկասի թեմերի առաջնորդ, ուր պաշտոնավարում է մինչև 1961 թվականը։

Հանգուցյալի հուղարկավորությունն ու թաղումը կատարվեցին մարտի 31-ին, Առավոտյան սուրբ պատարագ մատուցվեց Էջմիածին քաղաքի Ս. Աստվածածին եկեղեցում։ Պատարագին ներկա էին Վեհափառ Հայրապետը, Մայր Աթոռի միաբանությունը, Հոգևոր ձեռնարանի ուսանողությունը և պաշտոնեությունը։

Հանգուցյալի վերջին օծումը կատարեց գերաշնորհ Տ. Սահակ արքեպիսկոպոսը, որը և նախագահեց թաղմանական արարողության և խոսեց դամբանական։

Պատարագից հետո թաղման թափորը ուղղվեց դեպի Ս. Գայանեի վանքը, որտեղ հանգուցյալի աճյունը ամփոփվեց վանքի բակի միաբանական գերեզմանատանը։

Այնուհետև Մայր Աթոռի սեղանատանը տրվեց հոգեճաշ։ Հանգուցյալի հիշատակը ոգեկոչեցին գերաշնորհ Տ. Սահակ և Տ. Հայկազուն արքեպիսկոպոսները, հոգեշնորհ Տ. Մաշտոց վարդապետը, հոգեշնորհ Տ. Գրիգոր, Տ. Մեսրոպ և Տ. Ներսես արեղաները, արժանապատիվ Տ. Մկրտիչ և Տ. Նորայր քահանաները։

Հանգիստ Տ. Գարեգին ծայրագույն վարդապետի հոգուն։

